

SIARAN AKHBAR

Kuala Lumpur, 24 November 2015

SC Dakwa Bekas Ketua Pegawai Eksekutif Melewar Industrial Group Berhad atas Kesalahan Dagangan Orang Dalam

Suruhanjaya Sekuriti Malaysia (SC) hari ini mendakwa bekas Ketua Pegawai Eksekutif (CEO) Melewar Industrial Group Berhad, dan dua individu lain atas kesalahan dagangan orang dalam. Datuk Lim Kim Chuan, 56, dituduh di Mahkamah Sesyen Kuala Lumpur kerana memperolehi 398,000 unit saham M3nergy Berhad antara 6 Ogos 2008 dan 11 September 2008, ketika memiliki maklumat penting bukan awam.

SC mendakwa maklumat penting bukan awam yang disebutkan dalam pertuduhan adalah berkaitan dengan Tawaran Pengambilalihan Sukarela Bersyarat oleh Melewar Equities (BVI) Limited, pemegang saham utama Melewar Industrial Group Berhad untuk memperoleh saham-saham M3nergy. Pemerolehan saham-saham ini telah diumumkan kepada Bursa Malaysia pada 12 September 2008. Lim yang juga bekas pengarah M3nergy Berhad menghadapi sejumlah 11 pertuduhan di bawah CMSA. Lim dikatakan telah memperoleh saham-saham tersebut melalui akaun Tay Hup Choon dan Theng Boon Neoh. Tay Hup Choon, 47, seorang warganegara Singapura dan Theng Boon Cheng @ Tan Boon Cheng, 57, dituduh bersubahat dengan Lim dalam melakukan kesalahan tersebut.

Pertuduhan terhadap Lim, Tay dan Theng telah dibacakan di hadapan Hakim Mahkamah Sesyen Norsharidah Awang. Lim dibenarkan ikat jamin sebanyak RM250,000 dengan seorang penjamin manakala Tay dan Theng masing-masing diikat jamin sebanyak RM150,000 dan RM120,000 dengan seorang penjamin. Semua mengaku tidak bersalah terhadap pertuduhan masing-masing.

Pertuduhan bagi dagangan orang dalam telah dibuat mengikut seksyen 188(2) CMSA 2007 yang boleh dikenakan hukuman penjara tidak melebihi 10 tahun dan denda tidak kurang daripada RM1 juta.

SURUHANJAYA SEKURITI MALAYSIA

Pihak Media boleh menghubungi Jabatan Hal Ehwal Korporat di talian 03-62048305 (Lau Mei San), 02-62048265 (Delyana Nordin), 03-62048242 (Mohamad Lutfi Hakim), atau faks ke nombor: 03-62015078 atau e-mel: cau@seccom.com.my.

Maklumat Latar Belakang:

Suruhanjaya Sekuriti Malaysia (SC), sebuah badan statutori yang melapor kepada Menteri Kewangan, telah ditubuhkan bawah Akta Suruhanjaya Sekuriti 1993. Badan ini merupakan agensi pengawalseliaan tunggal bagi mengawal selia dan membangunkan pasaran modal. SC mempunyai tanggungjawab langsung bagi menyelia dan mengawasi aktiviti institusi pasaran, termasuk bursa dan rumah penjelasan, dan mengawal selia semua individu yang berlesen bawah Akta Pasaran Modal dan Perkhidmatan 2007. Maklumat lanjut mengenai SC boleh didapati di laman sesawang SC di www.sc.com.my. Ikut SC di Twitter di @SecComMy untuk maklumat terkini.